

quod media labitur planicie, hostes procul conspecti sunt: ii ab Antiocheno Rege erant missi, ut præsidio iis essent, qui ex montanis locis commeatum in urbem convehebant. Levis armatura in hostem missa, primo impetu fundit fugatque: fugientes victor miles partim obtruncat, partim trepidos in urbem compellit. Magna vis jumentorum, ingenisque commeatus copia eo die parta: quæ omnia, ut maxime necessaria, ita gratissima victoribus fuere. Ad flumen deinde Antiochiæ proximum ventum est, quod ab accolis *Farfar* nominari ajunt. Nos vero non ignoramus, Orontem Antiochiam alluere. Sed non solum fluminis nomen in dubium venit, verum de qua etiam Antiochia hæc recentes auctores scribant, vix intelligi posset, nisi urbis celebritas ea esset, quæ nos in tantis novorum scriptorum tenebris errare non sineret.

Nam & in Pamphilia Antiochia est, Seleuciæ vicina: & alia nobilior in Phœnicia, a Seleuco Nicanore Antiochi filio condita, olim Epidaphnæis cognominata, quam Orontes amnis dirimit. Huc igitur, quum Boemundus, Hugo, & alii ducerent copias, ex captivis hostibus cognitum est, in ea urbe Cassianum regnare, qui Babylonii Regis esset tributarius: atque idcirco ab eo multa hominum millia Antiochiam ad præsidium missa, qui adeo spectatæ virtutis esse crederentur, ut non modo non bello tentandi essent, sed ne acie quidem, si ultro arma inferant, expectandi. Ad ea verba non solum non territi sunt ductores, sed postridie sub ortum solis motis signis Boemundus cum quinque legionibus ad urbem progressus, hostes acie sub mœnibus structos ferocissime est adortus: sed murorum aliarumque munitionum vicinitas, quæ facilem laborantibus receptum præbuit, effecit ne totis utrinque viribus sit concursum. Pugna idcirco magis tumultuaria, & per alterius partis occasionem, quam stataria fuit: sed quamvis levis, ad vesperam tamen distracta est. Inclinate itaque die Boemundus ad suos se recepit; flumen quod inter urbem & castra pari prope spacio erat, ponte continuo junxere: castra ipsa ita disposita sunt, ut undique urbs obsidione cingere-

*Variæ præ-  
lia circa  
eam.*